

Luys Lnyu®



ՀՀ ՎԻՃԱԿԱԳՐԱԿԱՆ
ԿՈՄԻՏԵԻ ԿՈՂՄԻՑ
ՀՐԱՊԱՐԱԿՎԱԾ ՏՎՅԱԼՆԵՐԻ
ՎԵՐԱԲԵՐՅԱԼ ՎԵՐԼՈՒԾՈՒԹՅՈՒՆ

ՀՀ ՏՆՏԵՍՈՒԹՅԱՆ ՍՈՑԻԱԼ-ՏՆՏԵՍԱԿԱՆ ԶԱՐԳԱՅՈՒՄՆԵՐԸ 2019 ԹՎԱԿԱՆԻ ՀՈՒՆՎԱՐ-ՆՈՅԵՄԲԵՐ ԱՄԻՍՆԵՐԻՆ



ԲՈՎԱՆԴԱԿՈՒԹՅՈՒՆ

1. ՏՆՏԵՍԱԿԱՆ ԱԿՏԻՎՈՒԹՅՈՒՆ	1
1.1. Արդյունաբերություն.....	2
1.2. Շինարարություն.....	3
1.3. Ծառայություններ	4
1.4. Առևտուր.....	6
2. ԱՐՏԱՔԻՆ ԱՌԵՎՏՈՒՐ	6
3. ԱՇԽԱՏԱՎԱՐՁ	8
4. ՓՈԽԱՐԺԵՔ	9
5. ՀԱՐԿԱԲՅՈՒՋԵՏԱՅԻՆ ՀԱՏՎԱԾ	10
5.1. Բյուջեի եկամուտներ	10
5.2. Բյուջեի ծախսեր	10
5.3. Պետական բյուջեի հաշվեկշիռը	11
5.4. Պետական պարտք	12
6. ՖԻՆԱՆՍԱԿԱՆ ՀԱՏՎԱԾ	13
6.1. Գնաճ	13
6.2. Ավանդներ և վարկեր	13
7. ԱՄՓՈՓՈՒՄ	15

1. ՏՆՏԵՍԱԿԱՆ ԱԿՏԻՎՈՒԹՅՈՒՆ

Գծապատկեր 1. Տնտեսական ակտիվության ցուցանիշը, կուտակային, 2018-2019թթ., %




2019թ. հունվար-նոյեմբերին տնտեսական ակտիվության ցուցանիշը կազմել է 7.5%՝ նախորդ ամսվա նկատմամբ արագանալով մոտ 0.4 տոկոսային կետով: Նախորդ տարվա վերջում ՏԱՑ-ն ուներ դանդաղման միտում, սակայն ընթացիկ տարում դա չի նկատվում: Հետևաբար, կարելի է ենթադրել, որ 2019-ի տնտեսական աճը նույնպես կարագանա վերջին եռամսյակում և կլինի 7.5%-ի սահմաններում: ՏԱՑ-ի արագացումը հիմնականում պայմանավորված է արդյունաբերության և առևտրի ոլորտներում տնտեսական ակտիվության աճով:

Ամսական աճը, այսինքն՝ նոյեմբեր ամսվա աճը նախորդ տարվա նոյեմբերի նկատմամբ, կազմել է 10.1%, որը 2.1 տոկոսային կետով արագացել է նախորդ ամսվա համապատասխան ցուցանիշի համեմատ:


Տնտեսական ակտիվությանն ամենամեծ նպաստում ունեցող ճյուղը շարունակում է մնալ ծառայությունների ոլորտը՝ 6.1 տոկոսային կետով, որի նպաստման չափը, սակայն, ունի նվազման միտում: Տնտեսական ակտիվության աճին նպաստել են նաև արդյունաբերության (1.7 տոկոսային կետ), առևտրի (1.0 տոկոսային կետ) և շինարարության (0.3 տոկոսային կետ) համախառն թողարկման իրական աճերը:

Գծապատկեր 2. Տնտեսության ակտիվության ցուցանիշը և ճյուղերի նպաստումները, 2019թ. հունվար-նոյեմբեր¹, %



1.1. Արդյունաբերություն

Գծապատկեր 3. Արդյունաբերության համախառն թողարկման իրական կուտակային աճը, 2018-2019թթ., %



Արդյունաբերության ոլորտի աճը վերջին ամիսներին կայունացել է մոտ 9.0 տոկոսի սահմաններում: 2019 թվականի հունվար-նոյեմբեր ամիսներին արդյունաբերության աճը նախորդ տարվա նույն ժամանակահատվածի համեմատ կազմել է 9.3 տոկոս՝ նախորդ ամսվա նկատմամբ արագանալով 0.5 տոկոսային կետով:


¹ Գյուղատնտեսության ցուցանիշը հրապարակվում է եռամսյակային պարբերականությամբ՝ պայմանավորված գյուղատնտեսության սեզոնայնությամբ և բնակլիմայական ոչ կայուն պայմաններից կախված՝ ամսական արտադրության տատանողականության հարթեցման անհրաժեշտությամբ:

Արդյունաբերության աճը հիմնականում պայմանավորված է մշակող արդյունաբերության աճով (նպաստումը՝ 5.2 տոկոսային կետ), որի կառուցվածքում աճում են գրեթե բոլոր ենթաճյուղերը: Մասնավորապես, նշանակալի են ոչ մետաղական հանքային արտադրատեսակների արտադրության աճը (աճը՝ 44.9%, նպաստումը՝ 2.5 տոկոսային կետ), ծխախոտային արտադրատեսակների արտադրության (աճը՝ 13.0%, նպաստումը՝ 1.9 տոկոսային կետ) և սննդամթերքի արտադրության (աճը՝ 5.7%, նպաստումը՝ 1.6 տոկոսային կետ) աճերը²:

Ընթացիկ տարվա հունվար-հոկտեմբեր ամիսների տվյալներով արագացել է նաև հանքագործական արդյունաբերության աճի տեմպը՝ կազմելով 20.5 տոկոս (նախորդ ամսվա 19.5%-ի փոխարեն), որի նպաստումը ընդհանուր արդյունաբերության աճին 3.5 տոկոսային կետից դարձել է 3.6 տոկոսային կետ: Հանքագործական արդյունաբերության աճը գրեթե ամբողջությամբ պայմանավորված է մետաղական հանքաքարի արդյունահանման 21.1 տոկոս աճով, որի նպաստումը ընդհանուր արդյունաբերությանը կազմել է 3.6 տոկոսային կետ:

1.2. Շինարարություն

Գծապատկեր 4. Շինարարության իրական կուտակային աճը, 2018-2019թթ., %




Շինարարության ծավալի աճի տեմպը կայունացել է ցածր մակարդակում: Հունվար-նոյեմբեր ամիսների աճը նախորդ տարվա նույն ժամանակահատվածի նկատմամբ կազմել է 4.5%: Հատկանշական է, որ վերջին վեց ամիսներին շինարարության կուտակային աճը եղել է այս նույն մակարդակում:

² Արդյունաբերության կառուցվածքի վերլուծությունն իրականացվել է հունվար-հոկտեմբեր ամիսների տվյալների հիման վրա, հունվար-նոյեմբեր ամիսների համապատասխան ցուցանիշները դեռևս չեն հրապարակվել:

1.3. Ծառայություններ

Գծապատկեր 5. Ծառայությունների իրական կուտակային աճը, 2018-2019թթ., %




Ծառայությունների ոլորտը, մնալով տնտեսության ամենաարագ աճող ճյուղը, ցուցաբերում է աճի դանդաղման միտումներ: 2019թ. հունվար-նոյեմբեր ամիսների ընթացքում 2018թ. նույն ժամանակահատվածի նկատմամբ այս ճյուղն աճել է 14.8 տոկոսով, որն արդեն 3.6 տոկոսային կետով ավելի ցածր է, քան նախորդ տարվա ցուցանիշը (18.4%) և 0.3 տոկոսային կետով ավելի ցածր, քան նախորդ ամսվա ցուցանիշը:

Ծառայությունների աճի կառուցվածքը շարունակում է մնալ մտահոգիչ: Այս ճյուղի աճին ամենամեծ նպաստում ունեցողը մշակույթի, զվարճությունների և հանգստի ոլորտն է, որը հունվար-հոկտեմբեր ամիսների տվյալներով ծառայությունների աճին նպաստել է 4.9 տոկոսային կետով:

Ֆինանսական և ապահովագրական գործունեության աճը նախորդ ամսվա 18.3 տոկոսից դարձել է 17.5 տոկոս, իսկ նպաստումը՝ 3.8 տոկոսային կետից 3.6: Ծառայությունների աճին դրական նպաստում են ունեցել նաև մյուս բոլոր ենթաճյուղերի աճերը, որոնցից նշանակալի է եղել «կացության և հանրային սննդի կազմակերպում» (2.4 տոկոսային կետով) ենթաճյուղի նպաստումը³: Պետք է նկատել, որ ծառայությունների ոլորտում ամենաարագ աճողը «կացության և հանրային սննդի կազմակերպում» ենթաճյուղն է, որի աճը կազմել է 28.2%: Այս ենթաճյուղի աճը առավելապես կապված է զբոսաշրջության աճի հետ, հետևաբար դրա աճը նպաստում է ծառայությունների կառուցվածքի բարելավմանը:

³ Ծառայությունների կառուցվածքի վերլուծությունն իրականացվել է հունվար-հոկտեմբեր ամիսների տվյալների հիման վրա, քանի որ հունվար-սեպտեմբեր ամիսների համապատասխան ցուցանիշները դեռևս չեն հրապարակվել:


Գծապատկեր 6. Ծառայությունների կառուցվածքը և նպաստումները, 2019թ. հունվար-հոկտեմբեր, %⁴



⁴ 2019թ. հունվար-նոյեմբեր ամիսների համապատասխան ցուցանիշները դեռևս չեն հրապարակվել:

1.4. Առևտուր

Գծապատկեր 7. Առևտրի ծավալների իրական կուտակային աճը, 2018-2019թթ., %



Առևտրի ծավալների աճի տեմպը կայունացել է: Հունվար-նոյեմբեր ամիսներին առևտրի ոլորտի կուտակային աճի տեմպը նախորդ տարվա նույն ժամանակահատվածի նկատմամբ կազմել է 9.2 տոկոս և գրեթե հավասարվել է նախորդ տարվա համապատասխան ցուցանիշին:

2. ԱՐՏԱԲԻՆ ԱՌԵՎՏՈՒՐ

Գծապատկեր 8. Արտահանման կուտակային աճ, 2018-2019թթ., %



Արտահանման աճը վերականգնվում է, և նոյեմբեր ամսին նկատվում է աճի տեմպի արագացում: Ինչպես և ՏԱՅ-ը, արտահանման աճի արագացումը առավելապես կապված է նախորդ տարվա արտահանման ծավալների աճի

դանդաղման (ցածր բազայի) հետ: Հունվար-նոյեմբերին արտահանումն աճել է 9.0 տոկոսով:

Արտահանման աճը հիմնականում պայմանավորված է «թանկարժեք և կիսաթանկարժեք քարեր, թանկարժեք մետաղներ և դրանցից իրեր», «պատրաստի սննդի արտադրանք» և «հանքահումքային արտադրանք» ապրանքախմբերի արտահանման աճով, որոնց նպաստումները կազմել են համապատասխանաբար 4.2, 3.5 և 2.7 տոկոսային կետ: Մինչդեռ «ոչ թանկարժեք մետաղներ և դրանցից պատրաստված իրեր» և «մանածագործական իրեր» ապրանքախմբերի արտահանման ծավալները նվազել են՝ բացասաբար նպաստելով արտահանման աճին (համապատասխանաբար -1.8 և -2.9)⁵:

Գծապատկեր 9. Ներմուծման կուտակային աճ, 2018-2019թթ., %



Ներմուծման աճը նույնպես վերականգնվում է: Հունվար-նոյեմբեր ամիսներին այն աճել է 6.6%-ով, որը, սակայն, շարունակում է բավական ցածր մնալ նախորդ տարվա համապատասխան ցուցանիշից:

Ներմուծման ծավալների աճը առավելապես պայմանավորված է տրանսպորտային միջոցների ներմուծման 68.6% աճով, որը ընդհանուր ներմուծման աճին նպաստել է 5.2 տոկոսային կետով: Մնացած ապրանքախմբերից առավել նշանակալի է «քիմիական արտադրանք» և «հանքահումքային արտադրանք» ապրանքախմբերի աճերը, որոնք ընդհանուր ներմուծման աճին նպաստել են համապատասխանաբար 1.9 և 1.2 տոկոսային կետով:


⁵ Արտահանման կառուցվածքի վերլուծությունն իրականացվել է 2019թ. հունվար-հոկտեմբեր ամիսների տվյալների հիման վրա, քանի որ հունվար-նոյեմբեր ամիսների տվյալները դեռևս չեն հրապարակվել:

Միաժամանակ, «սարքավորումներ և մեխանիզմներ» ապրանքախմբի ներմուծման ծավալները շարունակում են նվազել՝ նախորդ տարվա նույն ժամանակահատվածի նկատմամբ կրճատվելով 12.2 տոկոսով և ընդհանուր ներմուծման ծավալի աճին ունենալով բացասական նպաստում՝ 2.3 տոկոսային կետով:

3. ԱՇԽԱՏԱՎԱՐՁ



2019թ. հունվար-նոյեմբերին նախորդ տարվա նույն ամիսների նկատմամբ միջին ամսական անվանական աշխատավարձն աճել է 5.9 տոկոսով: Ընդ որում՝ պետական հատվածում աշխատավարձն աճել է 8.3 տոկոսով, իսկ մասնավոր հատվածում՝ 4.0 տոկոսով: Նախորդ տարվա համապատասխան ցուցանիշները կազմել են 4.0, 2.2 և 3.9 տոկոս: Միջին ամսական անվանական աշխատավարձը կազմել է 178,809 դրամ, ընդ որում պետական հատվածում՝ 156,365 դրամ, իսկ մասնավոր հատվածում՝ 190,295 դրամ:

Գծապատկեր 10. Միջին ամսական անվանական աշխատավարձի աճը, 2018-2019թթ., հունվար-նոյեմբեր, %



4. ՓՈԽԱՐԺԵՔ

Գծապատկեր 11. Անվանական փոխարժեքի միտումները 2018-2019թթ., կուտակային աճ, % (աճը նշանակում է ՀՀ դրամի արժևորում)



2019 թվականի հունվար-նոյեմբերին ՀՀ դրամի միջին փոխարժեքն ԱՄՆ դոլարի նկատմամբ արժևորվել է 0.5 տոկոսով՝ նախորդ տարվա նույն ամիսների համեմատությամբ: Նույն ժամանակահատվածում եվրոյի նկատմամբ ՀՀ դրամը արժևորվել է 6.3 տոկոսով, իսկ ՌԴ ռուբլու նկատմամբ՝ 4.9 տոկոսով:


5. ՀԱՐԿԱԲՅՈՒՋԵՏԱՅԻՆ ՀԱՏՎԱԾ

5.1. Բյուջեի եկամուտներ

Պետական բյուջեի եկամուտներն աճում են բարձր տեմպերով, ինչը սակայն, ունի դանդաղման միտում: 2019 թվականի հունվար-նոյեմբեր ամիսներին ընդհանուր եկամուտներն աճել են 18.7 տոկոսով՝ կազմելով 1397.9 մլրդ դրամ, որից հարկերը և տուրքերը աճել են 19.0 տոկոսով՝ կազմելով 1314.1 մլրդ դրամ: Հարկային եկամուտների բարձր աճը առավելապես պայմանավորված է ավտոմեքենաների ներմուծման ծավալների՝ նախորդ տարվա համեմատ կտրուկ աճով:

5.2. Բյուջեի ծախսեր

Գծապատկեր 12. Պետական բյուջեի ծախսերի աճը և դրա բաղադրիչների նպաստումները, %




Պետական բյուջեի ծախսերը նույնպես աճում են, սակայն թերակատարման երևույթը պահպանվում է: ՀՀ պետական բյուջեի ծախսերը 2019 թվականի հունվար-նոյեմբեր ամիսներին կազմել են 1357.7 մլրդ դրամ՝ նախորդ տարվա նույն ժամանակահատվածի նկատմամբ աճելով 10.5%-ով, որը պայմանավորված է ինչպես ընթացիկ, այնպես էլ կապիտալ ծախսերի աճով: Ընթացիկ ծախսերն աճել են 9.5 տոկոսով՝ պայմանավորված հիմնականում սոցիալական նպաստների և կենսաթոշակների, ինչպես նաև ապրանքների և ծառայությունների ձեռքբերման աճով: Կապիտալ ծախսերը (ոչ ֆինանսական ակտիվների հետ գործառնություններ) նույն ժամանակահատվածում աճել են 24.1 տոկոսով՝ կազմելով 108.1 մլրդ դրամ: Հարկ է նշել, որ կապիտալ ծախսերի աճը

պայմանավորված է միայն ցածր բազայով, այսինքն՝ 2018թ. նույն ժամանակահատվածում կապիտալ ծախսերը զգալիորեն թերակատարվում էին: Տարվա ավարտին մնացել է մեկ ամիս, իսկ կապիտալ ծախսերի նախատեսված մակարդակն ապահովելու համար անհրաժեշտ է կատարել 126.1 մլրդ դրամի ծախս, որը, սակայն, դժվար թե իրականանա: Հետևաբար, կարելի է սպասել, որ 2019թ. բյուջեն ծախսերի մասով զգալի կթերակատարվի:

5.3. Պետական բյուջեի հաշվեկշիռը

Գծապատկեր 13. Պետական բյուջեի հավելուրդը (պակասուրդը -), ժամանակահատվածի վերջի դրությամբ, մլրդ դրամ



Պետական բյուջեն շարունակում է մնալ հավելուրդային: 2019թ. հունվար-նոյեմբեր ամիսներին բյուջեի հավելուրդը նվազել է նախորդ ամսվա համապատասխան ցուցանիշի նկատմամբ՝ կազմելով 40.2 մլրդ դրամ: Սակայն, հավելուրդի նվազումը պայմանավորված է ոչ թե պետական ծախսերի կատարողականի բարելավմամբ, այլ ԱԱՀ դեբետային գումարների վերադարձով: 2019թ. ճշտված պլանով նախատեսվում է տարեվերջին ունենալ 153.1 մլրդ դրամ պակասուրդ, որն անհրաժեշտական է փաստացի տվյալների պայմաններում:

5.4. Պետական պարտք

Գծապատկեր 14. ՀՀ կառավարության պարտքի (ԱՄՆ դոլարով) 12-ամսյա աճը, %




2019թ. նոյեմբերի վերջի դրությամբ ՀՀ կառավարության պարտքը կազմել է 6,654.0 մլն ԱՄՆ դոլար՝ նախորդ տարվա նույն ամսվա նկատմամբ աճելով 7.3 տոկոսով: Նախորդ ամսվա (հոկտեմբերի վերջի) նկատմամբ կառավարության պարտքն աճել է 51.7 մլն ԱՄՆ դոլարով (0.8%-ով): Ընդ որում, ներքին պարտքը նվազել է 3.6 մլն դոլարով, իսկ արտաքին պարտքն աճել է 55.3 մլն դոլարով:

2018թ. դեկտեմբերի վերջի նկատմամբ կառավարության ընդհանուր պարտքն աճել է 281.5 մլն դոլարով (4.4%-ով), ներքին պարտքն աճել է 153.7 մլն դոլարով (11.1%-ով), իսկ արտաքին պարտքն աճել է 127.8 մլն ԱՄՆ դոլարով (2.5%-ով): 2018թ. դեկտեմբերի վերջի նկատմամբ արտաքին պարտքի կշիռը նվազել է մոտ 1.4 տոկոսային կետով՝ կազմելով 76.9%:

6. ՖԻՆԱՆՍԱԿԱՆ ՀԱՏՎԱԾ

6.1. Գնաճ


Գծապատկեր 15. 12-ամսյա գնաճ, %



Չնայած ԿԲ կողմից տոկոսադրույքի նվազեցմանը՝ գնաճը մնում է ԿԲ թիրախից ցածր մակարդակում: Գնաճի նման ցածր տեմպերը ստիպել են ՀՀ կենտրոնական բանկին այս տարվա ընթացքում երկրորդ անգամ՝ սեպտեմբեր ամսին, նվազեցնել վերաֆինանսավորման տոկոսադրույքը՝ սահմանելով այն 5.5%, որը, կարծես թե, բավարար չի եղել գնաճը թիրախին մոտեցնելու համար: 2019թ. նոյեմբերին 12-ամսյա գնաճը կազմել է 1.0 տոկոս, որը թեև փոքր-ինչ ավելի բարձր է սեպտեմբեր ամսվա ցուցանիշից, սակայն բավական հեռու է ԿԲ թիրախի ստորին սահմանից՝ 2.5 տոկոսից:


6.2. Ավանդներ և վարկեր

Գծապատկեր 16. Ավանդների 12-ամսյա աճը 2018-2019թթ., %




2019թ. նոյեմբերին առևտրային բանկերի կողմից ներգրավված ավանդների ծավալների աճը 2018թ. նոյեմբերի նկատմամբ կազմել է 15.5 տոկոս: Ավանդների ծավալների աճի տեմպը գերազանցել է նախորդ տարվա համապատասխան ցուցանիշը մոտ 3.9 տոկոսային կետով:

Գծապատկեր 17. Ավանդների 12-ամսյա աճը՝ ըստ տնտեսության հատվածների (նպաստումները), 2019թ., %



Ավանդների աճին հիմնականում նպաստել են ոչ ռեզիդենտներից ներգրավված ավանդները՝ 6.7 տոկոսային կետով և տնային տնտեսություններից ներգրավված ավանդները՝ 6.0 տոկոսային կետով:

Գծապատկեր 18. Վարկերի 12-ամսյա աճին տնտեսության ճյուղերի նպաստումները, 2019թ., %



ՀՀ առևտրային բանկերի կողմից ռեզիդենտներին տրամադրված ընդհանուր վարկերը (արտարժույթով և ՀՀ դրամով) 2019թ. նոյեմբերին նախորդ տարվա նույն ամսվա համեմատ աճել են 17.9 տոկոսով, ինչին հիմնականում նպաստել են սպառողական վարկերը՝ 7.2 տոկոսային կետով (աճը՝ 31.2%), ինչպես նաև հիպոթեքային վարկերը (աճը՝ 39.7%) և ծառայությունների ոլորտին տրամադրված վարկերը (աճը՝ 32.5%)՝ համապատասխանաբար 3.4 և 5.6 տոկոսային կետով: Արդյունաբերության ոլորտին տրամադրված վարկերի ծավալը շարունակել է նվազել՝ 5.2%-ով՝ ընդհանուր վարկերի աճին նպաստելով -0.9 տոկոսային կետով: Վերջինս պայմանավորված է հանքարդյունաբերության ոլորտին տրամադրվող վարկերի ծավալների կրճատմամբ:

7. ԱՄՓՈՓՈՒՄ

1. 2019թ. հունվար-նոյեմբերին տնտեսական ակտիվությունն արագացել է՝ հիմնականում պայմանավորված արդյունաբերության և առևտրի աճերի արագացմամբ: Այսպես՝ արդյունաբերության կուտակային աճը հունվար-նոյեմբեր ամիսներին կազմել է 9.3 տոկոս՝ նախորդ ամսվա 8.8 տոկոս աճի փոխարեն, իսկ առևտրի աճը կազմել է 9.2 տոկոս՝ 8.9-ի փոխարեն:

2. Ծառայությունների կառուցվածքում նկատվում են դրական միտումներ: Ծառայությունների ոլորտում ամենաարագ աճողը «կացության և հանրային սննդի կազմակերպում» ենթաճյուղն է, որի աճը հունվար-հոկտեմբեր ամիսներին նախորդ տարվա նույն ժամանակահատվածի նկատմամբ կազմել է 28.2%: Այս ենթաճյուղի աճը առավելապես կապված է զբոսաշրջության աճի հետ, հետևաբար դրա աճը

մատնանշում է զբոսաշրջության աճի մասին, ինչը դրական երևույթ է ՀՀ տնտեսության համար:

3. Ներմուծման ծավալներն աճում են, ինչը պայմանավորված է տրանսպորտային միջոցների ներմուծման աճով: Սակայն պետք է նշել, որ հունվար-նոյեմբեր ամիսների աճը, այնուամենայնիվ, շարունակվում է ցածր մնալ նախորդ տարվա համապատասխան ցուցանիշից: Ներմուծվող ավտոմեքենաների զգալի մասի արտահանումը դեպի ԵԱՏՄ շուկա չի արտացոլվում վիճակագրությունում, այդ պատճառով արտահանման ցածր աճը կարող է չհամապատասխանել իրականությանը:

4. Հարկաբյուջետային քաղաքականության «խնայողական» վարքագիծը դեռևս պահպանվում է: Պետական բյուջեի հավելուրդը նվազել է՝ կազմելով 40.2 մլրդ դրամ, որը, սակայն, պայմանավորված է ոչ թե ծախսերի՝ պլանավորվածին համապատասխան իրականացմամբ, այլ ԱԱՀ-ի դեբետային գումարների վերադարձմամբ: **2019թ. ճշտված պլանով նախատեսվում է տարեվերջին ունենալ 153.3 մլրդ դրամ պակասուրդ, որը, սակայն արդեն հնարավոր չի լինի ապահովել:**

«ԼՈՒՅՍ հիմնադրամ» գրառմամբ հրապարակված նյութը պաշտպանված է ՀՀ օրենսդրությամբ և միջազգային համաձայնագրերով: Հրապարակված նյութի բոլոր իրավունքների բացառիկ իրավատերերը «ԼՈՒՅՍ» հիմնադրամն է:

Նյութի ամբողջական կամ դրանից քաղվածքների վերարտադրումը թույլատրվում է իրականացնել միայն «ԼՈՒՅՍ հիմնադրամ» գրառման և համապատասխան [ակտիվ հղման](#) տեղադրման պայմանով՝ պահպանելով «ԼՈՒՅՍ» հիմնադրամին պատկանող նյութերի օգտագործման կարգը: